

# Powšitkowne WOZJEWJENJA

njedźelu, 11. julija 2021

## Wusyłanje Božej mše

Serbskorěčnu Božu mšu móža wěriwi tutu njedźelu, 11. julija, znowa jako livestream w interneće scěhować. Wona přenese so w 9 hodž. z Chróšćanskeje cyrkwe. Link na nju je pod [www.posol.de](http://www.posol.de) a na wosadnej stronje podaty.

## Beneficny koncert za Morawu

Wjacore kulturne čělesa chcedža na dobro woporow tornada na južnej Morawje beneficny koncert wuhotować. Tutón wotměje so njedźelu, 25. julija, wot 10 do 13 hodž. na Chróšćanskim farskim dworje. Wšitcy zbliska a zdaleka su na njón wutrobnje přeprošeni. Wobjed budže zaručeny

Tornado je štwórtk, 24. junija, někotre gmejny na juhu Morawy domapytał. Při tym přisadži znajmjeńša pjeć wosobow swoje žiwjenje, 200 bu zranjenych. K tomu nasto hoberska materielna škoda. TCM je ze swojej akciju „Łužica pomha“ po wudyrjenju katastrofy zwisk do Brnjanskeje diecezy na Morawje nawjazało a prosy wšěch naležnje, zo bychu potrjechenych financielnje podpěrali. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Morawa“ přepokazać. Štůž swoju dospołnu adresu poda, tomu wustaji TCM darowansku kwitowanku. Brnjanske biskopstwo potom dary z Łužicy potrjechenym wosadam posrědkuje.

## Jězba po slědach swjateje Ludmile

Lětsa spominamy na 1.100lětnu posmjertniny swjateje Ludmile. W Čěskej so na tutón wjeršk wosebje přihotuja. Na swjatočnosćach chcemy so tež z Łužicy na tym wobdźělić. Jězba do Prahi je planowana wot štwórtka do soboty, 16. do 18. septembra. Program wopřija wodženje po čěskej stolicy po slědach swjateje Ludmile, winowy swjedzeń w Mělníku a narodnu putnisku Božu mšu w Tetínje, hdžež je swjata Ludmila 15. septembra 921 zemřela. Zajimcy za jězbu měli so hač do pjatka, 30. julija, pola Šmitec wozydłownistwa w Radworju přizjewić, telefonowe čisło (03 59 35) 28 60.

## Pišćelowy koncert w Rabicach

Z Rakec pochodžacy Matthias Bensch, kotryž je kantor w Havelbergskim domje, zahraje njedźelu, 11. julija, w 17 hodž. w Rabičanskej cyrkwi na pišćelach. Zaklinča twórby Friedricha Nicolause Bruhnsa, Johanna Sebastiana Bacha, Felixa Mendelssohna Bartholdyja a druhich. Zastup je darmotny. Wšitcy su wutrobnje přeprošeni.

## W Róžeńće modlenje před Najswjećišim

Na modlenje w serbskej a němskej rěči před wustajenym Najswjećišim sobotu, 24. julija, we 18 hodž. su wěriwi do Róžeńćanskeje swjatnicy přeprošeni. Škitne naprawy maja so wobkedžbować.

## **Nóc tysac swěčkow**

Na zahrodze klóštra Marijineje hwězdy w Pančicach-Kukowje wotměje so sobotu, 17. julija, zaso nóc tysac swěčkow. Prjedy hač budu zaswěćene, poskići so program na jewišću. Mjez druhim wustupja akrobača z Ottendorfa-Okrille a jazzowa dwójka Jan Brězan a Anina Batz zhromadnje z gitaristom Phillipom Adamom.

## **Prózdnińska jězba za džěci do Zehrena**

Dekanatne dušepastyrstwo džěci přeprošuje šulerki a šulerjow 5. do 8. lětnika w lětnich prózdninach na jězbu do Zehrena blisko Mišna. Wona wotměje so wot póndžele do pjatka, 23. do 27. awgusta. Swójski přinošk na wobdželnika wučinja 100 eurow. Přizjewjenja přijimuju hač do njedžele, 18. julija, ale jeničce online. Link na wotpowědnu stronu je pod [www.posol.de](http://www.posol.de) wozjewjeny.

## **Z busom do Krupki kemši**

Na putniku Božu mšu srjedu, 25. awgusta, w 10 hodź. w Krupce pojedže zaso bus. Štóž chcył sobu jěć, měł so w Šmitec wozydłownistwje w Radworju přizjewić, telefonowe čisło (03 59 35) 28 60.

## **Młodostni na jězbu do Oberammergauwa přeprošeni**

Dekanatne dušepastyrstwo za młodzinu přeprošuje serbskich młodostnych klětu w meji na zhromadnu jězbu do Oberammergauwa na předstajenje swětoznatych passionskich hrow. Wotjědu pjatk, 6. meje, nawječor a wróca so njedželu, 8. meje, wječor. Jónkrótnje móža sej młodostni ze wšeho swěta w starobje 16 do 28 lět tamnišu generalu wobhladać. Z tym dóstanu zastupny lisćik za 24 eurow, kotryž hewak znajmjeńša 150 eurow płaci. Po předstajenju změja přiležnosć, so z džiwadźelnikami rozmołwjeć. Nimo toho postaraja so Oberammergaučenjo wo kwartěry a zastaranje za přihódnou płaciznu. Zastup, zastaranje a nócłěh budže dohromady něhdže 70 eurow płacić. K tomu přińdu kóšty za transfer. Dalše informacije su pod [www.jugendtage-passions-spiele.de](http://www.jugendtage-passions-spiele.de) wozjewjene. Přizjewjenja přijimuje Worklečanske dekanatne młodžinske dušepastyrstwo hač do srjedy, 21. julija, ale jeničce online. Link k tomu je pod [www.posol.de](http://www.posol.de) podaty. Městna su wobmjezowane.

## **Pytaja hladarku abo hladarja**

Dom swjateje Ludmile w Chrósćicach poskića džělowe městno pomocneje hladarki, k čemuž njeje wukubłanje trěbne. Mužoj móža so runje tak wo městno požadać, při čimž dže wo dostojne zastaranje a hladanje staršich ludži. Nadrobniše informacije poda nawodnica Mónika Wenclowa, telefonowe čisło (03 57 96) 94 73 30.

## **Dalokostudij ke kubłanju dorosćenych**

Ewangelske a katolske kubłanje dorosćenych poskićujetej w kooperaciji nowy dwulětny dalokostudij ke kubłanju dorosćenych. Tutón zahaji so lětsa nazymu a wopřija pječ blokowych seminarow we wšelakich domach w srjedźnej Němskej. Štóž so hłowno- abo čestnohamtsce w kubłanskim džěle cyrkwjow, zwjazkow, ludowych šulow a druhich nošerjow angažuje, móže so we wobłuku tohole studija za nawjedowanske nadawki kwalifikować. Přizjewjenja přijimuje zarjad Ewangelskeho kubłanja dorosćenych Sakskeje (EEB) pod telefonowym čisłom (03 51) 8 12 42 11 abo z mejlku na [info@eeb-sachsen.de](mailto:info@eeb-sachsen.de). Katolske kubłanje dorosćenych Sakskeje (KEBS) wupisa za swoje sobustawske zarjadnišća tři stipendije. Požadanja přijimuju hač do 31. awgusta w jednačelni KEBS w Smochčanskim kubłanišću swjateho Bena abo z mejlku na [info@kebs.de](mailto:info@kebs.de). Linkaj z dalšimi informacijemi stej na internetowej stronje [www.posol.de](http://www.posol.de) podatej.

## **Wulět młodostnych do Sakskeje Šwicy**

Dekanatne dušepastyrstwo młodžiny přeprašuje młodostnych ze wšěch serbskich wosadow na zhromadny wulět do Sakskeje Šwicy, a to njedźelu, 19. septembra. Wotjězd budže něhdže w 12 hodź., nawrót je w 20 hodź. planowany. Přinošk we wysokosći 20 eurow wopřija jězbu z busom, jědź a jězbu z čolmom. Přizjewjenja přijimuja so hač do pónđzele, 30. awgusta, online. Wotpowědny link k tomu je pod [www.posol.de](http://www.posol.de) podaty. Dokładny plan, zwotkel bus w kotrym času pojedže, so wšěm, kotřiž su so přizjewili, po 30. awgusće wosobinsce zdžěli.